

27/04/1998

Selangor turut rangkul Piala Perdana

SHAH ALAM, Ahad - Selangor mengesahkan kedudukannya sebagai juara Sukan Malaysia (Sukma) VII di negeri sendiri apabila sukan 10 hari itu berakhir hari ini.

Dalam kiraan akhir pungutan pingat, Selangor unggul dengan 80 emas, 61 perak dan 41 gangsa, 34 emas mengatasi pencabar terdekatnya, Sarawak yang memungut 46 emas, 45 perak dan 41 gangsa.

Bagi Sarawak, jumlah pungutan emasnya menunjukkan kemerosotan berbanding dua tahun lalu di Pahang apabila memenangi 56 emas.

Selain unggul dengan emas terbanyak, kontinjen tuan rumah menjulang Piala Perdana, yang disampaikan Perdana Menteri, Datuk Seri Dr Mahathir Mohamad di Stadium Tertutup Shah Alam, malam ini.

Secara tidak langsung Selangor diberikan penghormatan sebagai pasukan pertama menerima anugerah Piala Perdana itu, yang julung kali diperkenalkan dalam Sukma kali ini.

Ini adalah kali ketiga Selangor muncul sebagai juara keseluruhan dari segi pungutan pingat emas.

Kali pertama ia muncul juara keseluruhan ialah sedekad lalu di Kuala Lumpur dan di Pahang dua tahun lalu, dengan hanya kelebihan satu emas daripada Sarawak.

Kejayaan muncul juara buat kali ketiga ini menyamai pencapaian Sarawak, yang muncul juara tiga kali berturut-turut bermula di Kuching pada 1990, diikuti pada 1992 di Johor dan 1994 di Ipoh.

Pungutan 80 emas adalah yang terbesar pernah dipungut kontinjen bergelar juara keseluruhan dan kali ini kejayaannya mengatasi Sarawak begitu selesa.

Pada hari terakhir hari ini, Selangor dan Sarawak berkongsi pungutan dengan lapan emas.

(END)